



Nuuk ulloq 14. oktober - 2019

Inatsisartut suleriaasianni § 37, imm. 1 naapertorlugu Naalakkersuisunut imatut apeqquteqarpunga:

Naalakkersuisunut apeqqutit:

- 1. Angerlarsimaffeqannginneq pillugu ajornartorsiummi Naalakkersuisut nutaanik suliniuteqarnissap, tassunga ilanngullugit angerlarsimaffeqanngisunut unnuiffiusinnasut, qulakkeernissaanik suliniuteqarnerlutik ilisimatitsissutigisinnaavaat?**
- 2. Angerlarsimaffeqanngitsut pillugit kommunit suleqatiginissaasa qulakkeerneqarnissaanik suliaq qanoq siuarsimatiginersoq Naalakkersuisut ilisimatitsissutigisinnaavaat?**
- 3. Angerlarsimaffeqanngitsut tassangaannarlu angerlarsimaffeeruttut pillugit ajornartorsiutit pillugit sulinermi kommunit namminerluunniit aningaasanik amerlanerusunik, isumalluutininik atugassiisoqarsimanersoq, aaqqiissutissatut periusissiaqarnersoq, soorlu unnuiffissanik inuunermiluunniit atukkat sakkortuut sakkukillisinneqarnissaannut, Naalakkersuisut ilisimatitsissutigisinnaavaat?**
- 4. UPA2019-imi imm. 88-ip akuerineqarnerani suliakkiissutigineqartup suliarinera qanoq siuarsimatiginersoq Naalakkersuisut ilisimatitsissutigisinnaavaat?**
- 5. Suliami soqutiginarunik allanik Naalakkersuisut ilisimatitsissuteqarsinnaappat?**
(Inatsisartunut ilaasorta q Tillie Martinussen, Suleqatigiissitsisut)

Tungavilersuut:

2019-imi Upernaakkut ataatsimiinnermi angerlarsimaffeqanngitsut angerlarsimaffeqanngitsullu pillugit aaqqiissutissatu qulakkeerneqarnissaanik sulineq oqallisigaarput. Tamanna immikkoortup 88-ip aamma 111-p oqallisigineqaranni pivoq. Imm. 88-imut allannguutissatut siunnersuut tassunga atatillugu akuerineqarpoq. Tassani kommunit ajornartorsiutinik aaqqiinnissaannut tungavissaqartilerniarlugit angerlarsimaffeqanngitsut pillugit Naalakkersuisut UKA2020-mut qulaajaanissaannik peqquneqarput.

Paasinninnera malillugu kommunit suleqatigalugit aaqqiissutissanik saqqummiinialuni sukkasuumik sulisoqarniarpoq. Tamassuma saniatigut paasinninnera malillugit 2019-imi ukioq nallertinnagu aaqqiissutissanik nassaarniarnissaq siamasissumik taparserneqarpoq. Taamaakkaluartoq iliuuseqaranni nassuaanissaq aalajangiunneqarpoq. Immikkoortoq 88-imi piffissamat sivikitsumut sivirusumullu aaqqiissutissat qulakkeerneqarnissaat siunertaanikuugaluarpoq.

Immikkoortut Inersuarmi oqallisigineqarneranni inoqatigut angerlarsimaffeqanngitsut amerliartortut aamma angerlarsimaffeqanngitsut pillugit nuna tamakkerlugu nutaanik aaqqiissuteqarnissaq qulakkeerniarlugu sukkasuumik sulinissap pingaarnera partiini tamani oqallisigaarput. Suleqatigiissitsisut siunnersuutaanni ukioq manna ukiunnginnerani tassangaannaq angerlarsimaffeeruttunut sukkasuumik aaqqiissuteqarnissaq, ukioq taannamiit taakku unnuiffissaasa qulakkeerneqarnissaat aamma immikkoortumi maannakkut ilisimasat aallaavigalugit sulinissaq uparuarneqarput.

Immikkoortup siullermeerneqarnerani Inersuarmi siamasissumik taparserneqarpoq, inernaluguli nassuaasionissamik Naalakkersuisut allannguutissatut siunnersuutaasa akuerineqarnera; suleqatigiissitap piffissaq suliffissaa innersuussutigalugu Siumumit Demokraatinillu amerlanerussuteqartunit.

Inersuarmili oqallisigineqarpoq ajornartorsiutip sammineqarnissaa qulakkeerneqassasoq, siunnersuummilu



SULEQATIGIISITSISUT
SAMARBEJDSPARTIET

suleqatigiissitaliornissaq itigartitsissitigineqarmat sulineq Naalakkersuit pisinnaanerat malillugu sukkanerpaamik aallartinneqassasoq.

Uagulli paasinninnerput malillugu partiit tamarmik Naalakkersuisullu iliuuseqarnissaq kissaatigaat – qulaajaaneq peqatigalugu iliuuseqartoqassasoq. Taamaammat taamatut kaammattuuteqarpugut maannakkullu apeqqutit uku saqqummiullugit.

Kalaallit Nunaat angerlarsimaffeqarfiussallugu nunarsuarmi atugarliornarnerpaat ilaagaat, Suleqatigiissitsisunilu inoqatigut aqqusinnermi najugaqartut ullut tamaasa ilassisarpagut. Pingaartumik tassanngaanaq angerlarsimaffeerunneq ukiuunerata ingerlanerani imatut iliuuseqarfigineqartariaqartigaq nassuiaat sukkanerpaamik suliarineqarneqartariaqarluni Naalakkersuisullu suliniutinik nutaanik sukkaasuumik aallartitsisariaqarlutik – aamma ajornartorsiut taanna ilungersunartoq iliuuseqarfiginiarlugu sapinngisamik nassuiaatip naammassinnginnerani.

Aaqqiissuteqarnissaq angerlarsimaffeqanngitsullu pillugit suliaqarnerup sammineqarnissaa partiinit tamarluinnangajannit neriorsuutigineqarpoq, paasinninnerlu malillugu kommunit suleqatigalugit sukkaasuumik aaqqiissuteqartoqarniarpoq. Isumaliutissiissuummi paasinarpoq angerlarsimaffeqanngitsut pillugit aammaarluni nassuiaatip aatsaat 2020-mi agguanneqarnissaa amerlanerussuteqartut kissaatigigaat. Ikinnerussuteqartut isumaqarput aammaarluni nassuiaasiornissaq pisariaqanngitsoq iliuusissatullu pilersaarut pisariaqartinneqartoq uparuarneqarluni.

Suleqatigiissitsisuni paasivarput maannakkut aaqqiissutit, assersuutigalugu containeri ineqartitsineq, siunertaq malillugu tamatigut sunniuteqarneq ajortut. Containerini ineqartitsinnermik assersuummi innuttaasunut ajornartorsiortunut amerlanngitsunik isumalluutinik atuisinnaasunut arlalinnik piomasaqartarneq pissutigalugu sunniuteqarneq ajorpoq.

Taamaalilluni atuisut 800 kr.-nik akiliisoqartarpoq, containerinilu najoqarnissamat suliffeqarnissaq piomasarineqarluni. Naggasiullugulu imaakkunarpoq angerlarsimaffeqanngitsut assigiinngiaartorujussuit ineqatigiinnissaat aaqqiissuummi sillimaffigineqarnikuunngitsoq, tamannalu pitsaasuumik nakkutiginnittoqannginnerani, paasiniaasoqannginnerani, avatangiisit pillugit sulisoqannginnerani ersarissunillu malittarisassaqaannginnerani isumaqatigiinnginnermik kinguneqartarpoq. Taamaalilluni aaqqiissutit pitsaanerpaamik atuutinngitsut ilinniarfigineqarsinnaapput nassuiaatillu nutaap naammassiniarnerani amerlanerusunik unnuiffissaqartitsiniarluni sulineq aallartinneqartariaqarluni, ikinnerusunik piomasqaateqarluni, aalajangersimasunik sulisoqarluni, imeqarluni, kiaqarluni siunnersuisoqarsinnaallunilu

Suleqatigiissitsisut isumaqarput inoqatigut tamarmik nallittorneqartariaqartut, ataqqinassuseqartariaqartut eqqissimasariaqartullu, imminut isumagisinnaanerat isumagisinnaannginneralluunniit apeqqutaatinnagu. Isumaqarpugut tamanna inuiaqatigiinni tullermik asannittunut inoqatinillu pingaartitsisunut tunngaviusoq. Taamaammat Naalakkersuisut aperaagut nunatsinni unnuakkut issittalernerani apineranilu inuiaqatigiinni navianartumiinnerpaat ajortianerpaallu ilaannut sunik suliniuteqarnikuunersut. Piviusumik oqaatigalugu.

Qinnuteqaatigineqarpoq apeqqutit ullut suliffiit qulit qaangiutsinnagit akineqassasut.

Tillie Martinussen

Samarbejdspariet - Suleqatigiissitsisut